



狗仔捉魚仔

田坵有一條九米闊个圳溝，安到「龍頸溪」，兩片礮坎有丈零高，礮坎頂高齊泥皮，有另外做尺零高个矮牆準凳仔坐，歸條礮坎都係俚欣賞河景个位所。圳肚水正兩米闊，流水像蛇形彎過來又扭過去，最深个水正齊膝頭恁深，淺灘處正齊腳盤，水流較急。魚仔愛泅上水，會堵著水淺个卵石地，逐尾魚仔都愛使暗力正泅得上，又乜有泅到半榜上毋去，嘎分水沖倒轉下背，魚仔斡頭照常向淺灘急水泅上水，一擺……兩擺。

今晡日請做園藝个造景師父來同羅漢松剪枝、雕型，這種事頭係外行，只能坐在圳畔茄苳樹下看佢等展功夫，半晝邊仔嶺榮个羅漢松畀整理到靚靚。遠遠有聽著腳步踏水聲，嘩哩啱洛又水花連天，俚看著三隻烏狗仔對下背踏水來，兩片遮岸各一隻狗嬾仔行淺灘逐魚仔，看著魚仔青驚泅上沙灘，狗仔就用前腳去拈魚仔，再走遽遽擎嘴食魚仔，一口一尾連骨打生食，狗仔真个蓋知味，這係最婁个沙西米。較壯个狗牯仔行中間，水較深時會泅水仔打水浪嚇魚仔，蓋像用打獵隊形在逐魚仔泅上水。

歸群歸陣个南洋鯽，分三隻狗仔逐到無哪好厝，拚命向上水个鵝卵石項泅，魚尾打在石頭項響出霹靂啪啪个聲音，水花擺白色个魚影，織成生存奮鬥圖像。三隻烏狗仔突然起腳盡走，蓋像講和地共樣，走到鵝卵石个所在，圍等魚仔相爭食，泅上一尾魚仔，狗仔就用嘴咬。係蓋多尾魚仔同時泅上水時，三隻狗仔食毋掣，就會用前腳去拈魚仔，將魚仔拈到毋會泅，嶄然圖豺个狗仔，魚仔泅上一尾就拈一尾，逐尾都拈到半生死留在淺灘項。俚揣放淺灘等佢緊眨白个魚仔，定著係愛留來定定長長食个，聰明个狗仔又知得好食愛留糧。

有兜魚仔分醒後，看到狗仔个烏影，共快泅轉頭沒入深水厝，河圳肚又恢復無聲無息，正伸著溪水流流流水打石个聲音。俚拍拍風企踎起來看圳溝肚，三隻狗仔食到有脰哩，影著人影有一息青驚，眼門門仔視等俚緊看，尾緊搖，將圓身个水拂燥後，斡頭行沙埔地向下水半行半走轉去。

該兜狗仔弛崗打陣在圳溝絡食，還會剔事將魚仔逐上沙灘再捉來過餐，真係精過骨面生毛个頭牲仔。

作者：李得福

☆詞彙學習☆

【半榜】ban bong`：一半的路程。

【嶺榮】dung` iung`：樹枝茂密。

【食毋掣】siid` m` cad`：來不及吃。

【定定長長】tin tin cong` cong`：慢慢的。

【分醒】fun` xiang`：清醒。

【拍拍風】mog mog fung`：突然間。

【有脰哩】iu` goi` le`：吃夠了。

【頭牲仔】teu` sang` e`：牲畜。